

**BOSNA I HERCEGOVINA  
FEDERACIJA BOSNE I HERCEGOVINE  
VLADA**

**Nacrt**

**Z A K O N  
O IZMJENAMA I DOPUNAMA ZAKONA O POSREDOVANJU  
U PRIVATNOM OSIGURANJU**

**Sarajevo, februar 2014. godine**

**Z A K O N**  
**O IZMJENAMA I DOPUNAMA ZAKONA O POSREDOVANJU**  
**U PRIVATNOM OSIGURANJU**

**Član 1.**

U Zakonu o posredovanju u privatnom osiguranju („Službene novine Federacije BiH“, br. 22/05 i 8/10), u članu 6. stav 2. u drugom redu iza riječi „obavljati“ dodaje se riječ „banke“, a u četvrtom redu iza riječi: „u“ dodaju se riječi: „bankama i“.

U stavu 5. riječi: „dva uzastopna izdanja“ zamjenjuju se riječima: „jednom izdanju“, a iza riječi „osiguranju“ dodaju se riječi: „i na web stranici društva“ .

**Član 2.**

U članu 7. stav 2. posljednja rečenica: „Društvo za zastupanje u osiguranju mora postaviti ovlaštenog zastupnika, koji je registriran kao zastupnik u osiguranju“, zamjenjuje se tekstom koji glasi:

„Lice ovlašteno za zastupanje društva mora biti registrovano kao zastupnik u osiguranju kod Agencije za nadzor. Zaposlenici društva za zastupanje u osiguranju koji rade na poslovima pribave osiguranja moraju imati položen stručni ispit za obavljanje poslova posredovanja u osiguranju“.

U stavu 9. u tački b) riječi: „podneseni dokumenti pokažu“, zamjenjuju se riječima: „ako se u postupku utvrdi“.

**Član 3.**

U članu 9. stav 1. posljednja rečenica zamjenjuje se novim tekstom koji glasi: „Lice ovlašteno za zastupanje brokerskog društva u osiguranju mora biti registrovano kao broker u osiguranju kod Agencije za nadzor. Zaposlenici brokerskog društva u osiguranju koji rade na poslovima pribave osiguranja moraju imati položen stručni ispit za obavljanje poslova posredovanja u osiguranju“.

U stavu 2., iza broja „7.“ dodaje se riječi: „stav 4.“.

U stavu 3. dodaje se nova tačka 1) koja glasi:

„1) osnivački akt;“

Iza dosadašnje tačke 1) koja postaje tačka 2) dodaje se nova tačka 3) koja glasi:

„3) poslovni plan društva“

Dosadašnje tač. 2) do 5) postaju tač. 4) do 7).

U stavu 6. u tački b) riječi: „podneseni dokumenti pokažu“ zamjenjuju se riječima: „ako se u postupku utvrdi“.

**Član 4.**

U članu 11. dodaje se nova alineja koja glasi:

„- postupak izdavanja odobrenja za obavljanje poslova zastupanja u osiguranju i uslove za obavljanje poslova zastupanja u osiguranju iz člana 6. stav 2. ovog zakona.“

#### **Član 5.**

U članu 12. dodaje se novi stav 2. koji glasi:

„U slučaju nepravilnosti utvrđenih u postupku nadzora Agencija za nadzor donosi rješenje.“.

#### **Član 6.**

U članu 15. iza broja „9“, dodaje se broj „12“.

#### **Član 7.**

U nazivu poglavlja V u tekstu Zakona na bosanskom i srpskom jeziku riječ „KRIVIČNE“ zamjenjuju se riječju: „KAZNENE“.

#### **Član 8.**

Član 16. mijenja se i glasi:

„ Član 16.  
Prekršajne odredbe

Novčanom kaznom od 15.000,00 KM kaznit će se za prekršaj pravno lice koje obavlja poslove posredovanja u osiguranju bez rješenja o odobrenju za rad Agencije za nadzor iz čl. 7. i 9. ovog zakona;

Novčanom kaznom od 1.000,00 KM do 15.000,00 KM kaznit će se za prekršaj:

- a) posrednik u osiguranju koji posluje preko organizacione jedinice prije rokova predviđenih članom 4. stav 3. ovog zakona;
- b) društvo za zastupanje u osiguranju ako ne obavlja djelatnost zastupanja u osiguranju u skladu sa članom 6. stav 1. ovog zakona;
- c) društvo za zastupanje u osiguranju ako ne zaključi ugovor o zastupanju u osiguranju u skladu sa članom 6. stav 2. ovog zakona;
- d) društvo za osiguranje ako ne zaključi ugovor o zastupanju u osiguranju ili ako isti ne dostavi Agenciji za nadzor u skladu sa članom 6. stav 3. ovog zakona;
- e) društvo za osiguranje ako ne obavijesti Agenciju za nadzor o raskidu ugovora o zastupanju u osiguranju u skladu sa članom 6. stav 4. ovog zakona;
- f) društvo za zastupanje u osiguranju ako zaključi ugovore o osiguranju u ime i za račun društva za osiguranje sa kojim je raskinut ili istekao ugovor o zastupanju u osiguranju u skladu sa članom 6. stav 5. ovog zakona. U ovom slučaju društvo se ne može pozvati na raskid ugovora o zastupanju protiv osiguranika;
- g) javna preduzeća poštanski operateri i banke u kojima poslove zaključivanja ugovora o osiguranju obavljaju fizička lica koja nisu registrovana kod Agencije za nadzor u skladu sa članom 7. stav 3. ovog zakona;

- h) brokersko društvo u osiguranju ako ne obavlja djelatnost u skladu sa članom 8. stav 2. ovog zakona;
- i) brokersko društvo u osiguranju ako ne drži na posebnom računu sve iznose koje društvo za osiguranje uplati za osiguranika u skladu sa članom 9. stav 9. ovog zakona;
- j) brokersko društvo u osiguranju ako ne postupa u skladu sa članom 10. ovog zakona;
- k) društvo za osiguranje i posrednici u osiguranju ako ne dostavljaju podatke u obimu, na način i u rokovima koje propiše Agencija za nadzor u skladu sa članom 13. ovog zakona;
- l) društvo za posredovanje u osiguranju i brokersko društvo u osiguranju koje obavlja i druge vrste djelatnosti pored djelatnosti posredovanja u osiguranju;
- m) društvo za posredovanje u osiguranju koje za obavljanje poslova posredovanja u osiguranju angažuje lica koja nisu u radnom odnosu kod posrednika u skladu s čl. 7. i 9. ovog zakona.

Za prekršaje iz st. 1. i 2. ovog člana kaznit će se i odgovorno lice u pravnom licu novčanom kaznom od 500,00 KM do 3.000,00 KM.

Novčanom kaznom od 500,00 KM do 1.500,00 KM kaznit će se za prekršaj:

- a) zastupnik u osiguranju fizičko lice, ako ne obavlja djelatnost zastupanja u osiguranju u skladu sa članom 6. stav 1. ovog zakona;
- b) zastupnik u osiguranju fizičko lice ako ne zaključi ugovor o zastupanju u osiguranju u skladu sa članom 6. stav 2. ovog zakona;
- c) zastupnik u osiguranju fizičko lice ako zaključi ugovore o osiguranju u ime i za račun društva za osiguranje sa kojim je raskinut ili istekao ugovor o zastupanju u osiguranju u skladu sa članom 6. stav 5. ovog zakona. U ovom slučaju društvo se ne može pozvati na raskid ugovora o zastupanju protiv osiguranika;
- d) broker u osiguranju fizičko lice ako ne obavlja djelatnost u skladu sa članom 8. stav 2. ovog zakona;
- e) broker u osiguranju fizičko lice ako ne drži na posebnom računu sve iznose koje društvo za osiguranje uplati za osiguranika u skladu sa članom 9. stav 9. ovog zakona;
- f) broker u osiguranju fizičko lice, ako ne postupa u skladu sa članom 10. ovog zakona.

## **Član 9.**

Ovaj zakon stupa na snagu osmog dana od dana objave u „Službenim novinama Federacije BiH“.

# O B R A Z L O Ž E N J E

## I. USTAVNI OSNOV

Ustavni osnov za donošenje Zakona o dopunama Zakona o posredovanju u privatnom osiguranju sadržan je u članu III. 1. tačka c. koji je izmijenjen amandmanima VIII, LXXXIX i CVI i članku IV. A 20. (1) d) Ustava Federacije Bosne i Hercegovine, prema kojima je u isključivoj nadležnosti Federacije Bosne i Hercegovine donošenje propisa o finansijama, a Parlament Federacije BiH uz ostala ovlaštenja predviđena Ustavom, odgovoran je za donošenje zakona o vršenju dužnosti u federalnoj vlasti.

## II. RAZLOZI ZA DONOŠENJE ZAKONA

Zakonom o izmjenama i dopunama Zakona o bankama („Službene novine Federacije BiH“, broj 66/13) članom 39., stav 1. tačka 12. propisano je da se i banke mogu baviti poslovima posredovanja u osiguranju. Da bi banke mogle obavljati poslove posredovanja u osiguranju potrebno je izvršiti usklađivanje Zakona o posredovanju u privatnom osiguranju sa Zakonom o bankama, čime bi se stvorio pravni okvir u kojem bi se banke mogle baviti ovom djelatnošću što bi doprinijelo daljem razvoju industrije osiguranja. Dalje, izvršene su i određene izmjene i dopune ovog Zakona radi poboljšanja pojedinih odredbi Zakona koje su se pokazale nedovoljno preciznim ili nisu do kraja definirane što je u provođenju Zakona i nadzoru nad radom društava stvaralo smetnje. Također, uvedene su prekršajne odredbe koje nisu bile predmetnom Zakona što je Agenciji za nadzor otežavalo izricanje sankcija društvima za osiguranje koja su kršila odredbe ovog Zakona jer su u Zakonu bili propisani samo krivični prekršaji, a krivične odredbe su brisane, jer su iste regulirane posebnim zakonom.

## III. USKLAĐENOST SA EVROPSKIM DIREKTIVAMA

Ovim zakonom ne vrši se usklađivanje sa EU direktivama, s obzirom da je cilj ovoga zakona usklađivanje sa Zakonom o bankama koji predviđa da se i banke mogu baviti poslovima posredovanja u osiguranju što materijalnim Zakonom o posredovanju u privatnom osiguranju nije bilo propisano kao i preciziranje pojedinih odredbi Zakona koje nisu bile dovoljno jasno precizirane što je stvaralo teškoće kod primjene i tumačenja Zakona.

## IV. OBRAZLOŽENJE PO POJEDINIM ČLANOVIMA

### Član 1.

Izmjene i dopune su izvršene iz razloga usaglašavanja Zakona o posredovanju u privatnom osiguranju sa Zakonom o izmjenama i dopunama Zakona o bankama („Službene novine Federacije BiH“, broj 66/13).

### Čl. 2., 3., 4. i 6.

Izmjene i dopune predložene iz razloga jasnosti i preciznosti zakonskih odredbi te usaglašavanja sa odredbama Zakona o privrednim društvima („Službene novine Federacije BiH“, br. 23/99, 45/00, 2/02, 6/02, 29/03, 68/05, 91/07, 84/08, 88/08, 7/09, 63/10 i 75/13).

**Član 5.**

Dopuna predložena iz razloga mogućnosti provedbe upravnog postupka t.j. nadležnosti Agencije za nadzor kao nadzornog tijela. Usklađivanje sa odredbama Zakona o upravi i Zakona o upravnom postupku.

**Čl. 7. i 8.**

Predloženom izmjenom predviđeni su prekršaji i sankcije kao adekvatna kazna u slučaju kršenja Zakona i podzakonskih akata. Krivične odredbe su brisane jer su one regulirane posebnim zakonom.

**V. FINANSIJSKA SREDSTVA**

Za donošenje i primjenu ovog Zakona nisu potrebna dodatna finansijska sredstva u budžetu Federacije BiH.

# ZAKON O POSREDOVANJU U PRIVATNOM OSIGURANJU

## TEKST ODREDBI KOJE SE MIJENJAJU

("Službene novine Federacije BiH", br.: 22/05 i 8/10)

### Član 6.

#### Opće odredbe

Zastupnik u osiguranju je pravno ili fizičko lice koje obavlja profesionalnu djelatnost, prema jednom ili više ugovora ili ovlaštenja kojima je dobio uputstvo ili pravo da djeluje u ime i za račun, ili samo za račun, jednog ili više društava. Zastupnik u osiguranju ima isključivi profesionalni cilj da pokreće, predlaže i izvršava pripreme radove do zaključenja ili da zaključuje ugovore o osiguranju. Zastupnik u osiguranju može pomagati u primjeni ili izvršenju ugovora, a posebno u slučaju odštetnog zahtjeva. Zastupnik u osiguranju može pružati i savjetodavne usluge, u skladu sa posebnim odredbama pojedinačnih ugovora sa osiguranikom, tokom perioda pokrića osiguranjem. Zastupnik u osiguranju samostalno obavlja djelatnost.

Izuzetno od odredbe stava 1. ovog člana, djelatnost zastupanja u osiguranju mogu obavljati i javna preduzeća - poštanski operateri koja su za obavljanje tih usluga dobila dozvolu Agencije za nadzor. Poslove zastupanja osiguranja u javnim preduzećima mogu obavljati osobe registrirane u Registru Agencije za nadzor.

Ugovor između društva i zastupnika u osiguranju mora biti zaključen u pisanoj formi, a primjerak ugovora o zastupništvu društvo mora dostaviti Agenciji za nadzor. Društvo ima obavezu da odmah u pisanoj formi obavijesti Agenciju za nadzor o raskidu ugovora o zastupništvu, bez obzira na razlog raskida. Društvo, obavještenje o raskidu ili isteku ugovora o zastupništvu, objavljuje u dva uzastopna izdanja dnevnih novina većeg tiraža, koja se izdaju na području u kojem posluje zastupnik u osiguranju.

### Član 7.

#### Registrovanje

Društvo za zastupanje u osiguranju osniva se kao dioničko društvo ili društvo sa ograničenom odgovornošću, u skladu sa odredbama zakona kojim se uređuje pravni položaj privrednog društva, ako ovim zakonom pojedina pitanja nisu drugačije uređena.

Da bi zastupnik u osiguranju mogao da obavlja svoju djelatnost u Federaciji obavezan je da se registruje u posebnom registru zastupnika u osiguranju, koji vodi Agencija za nadzor. Registar sadrži dva podregistra i to: podregistar sa imenima zastupnika u osiguranju koji su registrovani u Federaciji i podregistar sa imenima zastupnika u osiguranju koji su registrovani u RS i koji pružaju usluge osiguranja u Federaciji preko organizacione jedinice u Federaciji. Društvo za zastupanje u osiguranju, mora biti registrovano u posebnom registru društava za zastupanje u osiguranju, koji vodi Agencija za nadzor. Registar je podijeljen na podregistre po istom principu koji je predviđen za zastupnike u osiguranju. Društvo za zastupanje u osiguranju mora postaviti ovlaštenog zastupnika, koji je registriran kao zastupnik u osiguranju. Zastupnici u osiguranju plaćaju godišnju naknadu i taksu za registrovanje, u skladu sa propisima koje donosi Agencija za nadzor.

Za upis u registar zastupnika u osiguranju, uz zahtjev za registrovanje kod Agencije za nadzor, podnosilac zahtjeva mora priložiti slijedeće :

1) uvjerenje o položenom stručnom ispitu za poslove posredovanja. Pravila polaganja

stručnog ispita propisuje Agencija za nadzor u skladu sa stavom 1. alineja 1. člana 11. ovog zakona;

2) dokaz da ima najmanje srednju stručnu spremu i da ima najmanje jednogodišnje iskustvo iz područja poslova osiguranja;

3) potvrdu kojom dokazuje da podnosilac zahtjeva nije pod sudskim nadzorom ili staranjem;

4) dokumente koji potvrđuju da podnosilac zahtjeva posjeduje određeno stručno znanje i profesionalnu sposobnost. Ti dokumenti će dokazivati da je podnosilac zahtjeva obavljao djelatnost zastupnika u osiguranju ili brokera u osiguranju u BiH ili nekoj zemlji članici Evropske unije ako je:

- četiri uzastopne godine samostalno obavljao djelatnost ili kao rukovodilac društva, ili kada podnosilac zahtjeva može dokazati da je najmanje tri godine radio sa jednim ili više zastupnika ili posrednika u osiguranju ili sa jednim ili više društava, ili

- dvije uzastopne godine samostalno obavljao djelatnost ili kad podnosilac zahtjeva dokaže da je obavljao funkcije u službi jednog ili više posrednika ili zastupnika u osiguranju ili u jednom ili više društava, ili

- jednu godinu samostalno obavljao djelatnost ili u svojstvu rukovodioca društva ili kada podnosilac zahtjeva dokaže da je za predmetnu djelatnost stekao prethodno obrazovanje, što se dokazuje potvrdom koja je službeno priznata od strane države ili za koju nadležno tijelo smatra da u potpunosti zadovoljava njegove zahtjeve.

Za podnosioca zahtjeva smatra se da je vodio djelatnost u svojstvu rukovodioca, u smislu ovog člana, kada je obavljao odgovarajuću djelatnost:

- kao rukovodilac nekog društva ili rukovodilac podružnice nekog društva, ili

- kao zamjenik rukovodioca nekog društva ili kao njegov ovlaštenu zastupnik, ako je taj položaj uključivao odgovornost jednaku odgovornosti rukovodioca kojeg predstavlja.

Za podnosioca zahtjeva smatra se da je obavljao djelatnost u svojstvu rukovodioca, u smislu ovog člana, kada su njegove dužnosti u tom društvu uključivale rukovođenje zastupnicima u osiguranju ili vršenje nadzora nad njihovim radom. Poslovi moraju uključivati odgovornost u pogledu pribavljanja, zaključivanja, obrade i izvršavanja ugovora o osiguranju. Obavljanje djelatnosti koja je u pitanju ne smije biti prekinuto više od 10 godina prije datuma kada se podnosi zahtjev za registrovanje.

Dokumenti iz tač. 3. i 4. stava 4. ovog člana neće biti prihvaćeni ako su stariji od šest mjeseci od dana podnošenja zahtjeva.

Uz zahtjev za izdavanje odobrenja društvu za obavljanje poslova zastupanja u osiguranju, moraju se priložiti slijedeći dokumenti:

1) osnivački akt;

2) statut koji mora sadržavati elemente propisane u skladu sa odredbama zakona koji uređuju pravni položaj privrednog društva, ako ovim zakonom pojedina pitanja nisu drugačije uređena ;

3) dokaz banke o uplati temeljnog kapitala;

4) spisak dioničara;

5) poslovni plan društva;

6) dokaz o kadrovskoj i tehničkoj osposobljenosti društva.

Registrovanje se vrši na period od dvije godine. Zastupnik u osiguranju će ponovo podnijeti sve dokumente navedene u ovom članu u roku od 30 dana prije dana isteka roka od dvije godine za koji se posjeduje registracija. Za registrovanje će se smatrati da ostaje na snazi osim ako:

a) zastupnik u osiguranju propusti da podnese dokumente ponovo, u skladu sa ovim stavom; ili

b) podneseni dokumenti pokažu da podnosilac zahtjeva više nije lice podobno da djeluje kao zastupnik u osiguranju.

Agencija za nadzor će u roku od 30 dana od dana podnošenja zahtjeva i dokumenata, donijeti rješenje kojim odlučuje o zahtjevu ili tražiti ispravku ili dopunu zahtjeva.

## Član 9.

### Registrowanje

Broker u osiguranju za obavljanje svoje djelatnosti mora biti registrovan u posebnom registru za brokere u osiguranju, koji vodi Agencija za nadzor. Registar sadrži dva podregistra i to: podregistar sa imenima brokera u osiguranju koji su registrovani u Federaciji i podregistar sa imenima brokera u osiguranju koji su registrovani u RS i koji pružaju usluge osiguranja u Federaciji preko organizacione jedinice u Federaciji. Brokerska društva u osiguranju, moraju biti registrovana u posebnom registru brokerskih društava u osiguranju, koji vodi Agencija za nadzor i koji je podijeljen na podregistre, po istom principu koji je predviđen za pojedinačne brokere u osiguranju. Brokerska društva u osiguranju moraju postaviti ovlaštenog zastupnika koji je registrovani broker u osiguranju.

Fizičko lice koje se želi registrovati kod Agencije za nadzor, kao broker u osiguranju, uz zahtjev mora priložiti dokumente navedene u članu 7. ovog zakona.

Da bi se registrovalo, brokersko društvo u osiguranju Agenciji za nadzor uz zahtjev podnosi slijedeće dokumente:

- 1) statut koji mora sadržavati elemente propisane u skladu sa odredbama zakona koji uređuju pravni položaj privrednog društva, ako ovim zakonom pojedina pitanja nisu drugačije uređena ;
- 2) dokaz da podnosilac zahtjeva ima deponovana sredstva u iznosu 200.000,00 KM u cilju obavljanja djelatnosti;
- 3) zahtjevi pod tač. 1) i 2) ovog stava ne odnose se na fizička lica;
- 4) dokumente koji dokazuju da je podnosilac zahtjeva osiguran od profesionalne odgovornosti u slučaju greške ili propusta sa minimalnim pokrićem u iznosu 400.000,00 KM. Navedeni ugovor o osiguranju mora pokrivati period jednak registraciji društva za posredovanje u osiguranju uvećan za jedan mjesec;
- 5) dokument kojim dokazuje da je direktor brokerskog društva u osiguranju registrovan kao broker u osiguranju, u skladu sa odredbama ovog zakona.

Brokери u osiguranju plaćaju godišnju naknadu i taksu za registrovanje, kako se odredi propisima koje donese Agencija za nadzor.

Registrovanje se vrši na period od dvije godine. Broker osiguranja će ponovo podnijeti sve dokumente navedene u ovom članu u roku od 30 dana prije dana isteka roka od dvije godine za koji se posjeduje registracija.

Za registrovanje će se smatrati da ostaje na snazi osim ako:

- a) broker u osiguranju propusti da ponovo podnese dokumente, predviđene ovim članom i
- b) podneseni dokumenti pokažu da podnosilac zahtjeva više nije lice podobno da djeluje kao broker u osiguranju.

Pored zahtjeva iz ovog člana broker u osiguranju ako je fizičko lice, mora imati blokiranu imovinu u iznosu od 200.000,00 KM radi dobrog izvršavanja njegovih djelatnosti. Podnosilac zahtjeva mora dodatno podnijeti dokumente koji potvrđuju da ima važeće osiguranje od profesionalne odgovornosti u slučaju greške ili propusta. Ugovarači osiguranja imaju privilegiju nad blokiranom imovinom, koja ima prednost ispred bilo koje druge opće ili posebne privilegije. Načini na koje se ta imovina blokira, kao i sve neophodne pojedinosti za rad osiguranja od profesionalne odgovornosti brokera u osiguranju se uređuju Pravilnikom o regulisanju blokiranja imovine i osiguranja odgovornosti brokera u osiguranju koji donosi Agencija za nadzor. Sve iznose koje društvo plati brokeru u osiguranju za račun osiguranika, broker u osiguranju će držati na posebnom računu. Taj račun se neće koristiti za isplatu bilo kojih drugih povjerilaca brokera u osiguranju. U slučaju nesolventnosti brokera u osiguranju, iznosi koji se drže na posebnom računu će se prvenstveno iskoristiti za isplatu svih neizmirenih iznosa koje broker u osiguranju duguje svojim klijentima za neplaćene odštete osiguranja.

Agencija za nadzor će u roku od 30 dana od dana podnošenja zahtjeva i dokumenata donijeti rješenje kojim odlučuje o zahtjevu ili tražiti ispravku ili dopunu zahtjeva.

#### **Član 11.**

Agencija za nadzor propisuje:

- uslove za dobijanje i provjeru stručnih znanja potrebnih za obavljanje poslova posredovanja u osiguranju u skladu sa ovim zakonom;
- pravila o vođenju registra, podacima koji se upisuju u te registre i način javnog pristupa tim registrima.

#### **Član 12.**

Nadzor nad poslovanjem posrednika u osiguranju obavlja Agencija za nadzor.

#### **Član 15.**

Rješenje Agencije za nadzor iz čl. 7., 9. i 14. ovog zakona je konačno i protiv njega se može pokrenuti upravni spor tužbom kod nadležnog suda.

### **V – KRIVIČNE ODREDBE**

#### **Član 16.**

Krivične odredbe

Kaznom zatvora od 90 dana do dvije godine i novčanom kaznom do iznosa od 10.000,00 KM kaznit će se:

- posrednik u osiguranju koji obavlja poslove posredovanja u osiguranju bez rješenja o odobrenju za rad iz čl. 7. i 9. ovog zakona;
- zastupnik u osiguranju koji zaključi ugovor o osiguranju u ime i za račun društva sa kojim je istekao ugovor o zastupništvu iz člana 6. ovog zakona. U ovom slučaju društvo se ne može pozvati na raskid ugovora o zastupništvu protiv osiguranika;
- odgovorno lice društva koje svjesno angažuje kao zastupnika u osiguranju lice koje kod Agencije za nadzor nije registrovano kao zastupnik u osiguranju, i/ili koje Agenciji za nadzor nije podnijelo ugovor o zastupništvu iz člana 6. ovog zakona.

#### **Član 18.**

Svi postojeći posrednici u privatnom osiguranju dužni su da se registruju kod Agencije za nadzor i usklade svoje poslovanje u skladu sa ovim zakonom u roku od jedne godine od dana stupanja na snagu ovog zakona.